

Mukhriz: DAP, PKR berjaya pengaruhi PAS tukar prinsip

Malaysiakini.com

June 4, 2011

DAP dan PKR berjaya mempengaruhi PAS sehingga prinsip untuk menubuhkan negara Islam yang diperjuangkan oleh parti itu sejak sekian lama kini ditukar kepada konsep negara berkebajikan, kata Timbalan Pengerusi Badan Perhubungan Umno Kedah, Datuk Mukhriz Mahathir.

Beliau berkata, PAS juga dilihat tidak tetap pendirian apabila mengubah prinsip daripada memperjuangkan negara Islam kepada negara berkebajikan kerana mahu merealisasikan hasrat DAP dan PKR untuk memperjuangkan rakyat berbilang kaum di Malaysia.

"Tahniah kepada DAP dan PKR kerana berjaya mempengaruhi PAS sehinggakan hanya orang-orang mereka saja (bukan ulama) yang dipilih menjadi Naib Presiden malah Timbalan Presiden dalam PAS.

"Cukup hebat sekali pengaruh DAP dan PKR dalam PAS. Ini tidak menunjukkan bahawa PAS adalah sebuah parti yang bebas daripada pengaruh yang sebenarnya bertentangan dengan ajaran Islam," katanya selepas melancarkan Program Siswa Siwi Bersama Rakyat di Jerlun, hari ini.

Beliau yang juga Timbalan Menteri Perdagangan Antarabangsa dan Industri, mengulas mengenai keputusan pemilihan PAS hari ini dan ucapan dasar Presiden PAS, Datuk Seri Abdul Hadi Awang pada Muktamar Tahunan PAS ke-56 semalam yang mengetengahkan tema Membangunkan Negara Berkebajikan.

Mukhriz juga berkata, keputusan pemilihan PAS itu langsung tidak menggambarkan sokongan ahli atau perwakilan PAS terhadap golongan ulama dalam PAS.

"Pada mulanya saya rasa terharu dan gembira apabila saya mendengar ucapan-ucapan dari Dewan Ulama PAS, tetapi hari ini perasaan gembira itu bertukar menjadi bimbang dan sedih kerana golongan itu (ulama) dipinggirkan dan sekali gus membuang prinsip penubuhan negara Islam," katanya.

Golongan ulama PAS yang diwakili Timbalan Presiden, Nasharuddin Mat Isa dan Pesuruhjaya PAS Pahang, Tuan Ibrahim Tuan Man tewas dalam pertandingan jawatan Timbalan Presiden kepada Mohamad Sabu.

Jawatan Naib Presiden juga dikuasai golongan bukan ulama apabila Salahuddin Ayub, Datuk Husam Musa dan Datuk Mahfuz Omar menang dalam pertandingan enam penjur.

Mukhriz berkata, pembentukan negara berkebajikan yang diumumkan Abdul Hadi sebenarnya sudah diperjuangkan Umno dan BN sejak merdeka lagi.

"Kalau tidak perhatian dan kebajikan rakyat, tidak mungkin kita boleh mencapai pada tahap yang begitu membanggakan. Jadi bab kebajikan itu sudah menjadi pegangan dan perjuangan kepimpinan BN dan Umno dari dulu lagi," katanya.

Beliau berkata, walaupun PAS tidak mahu mengadakan kerjasama politik dengan Umno, tetapi usaha untuk perpaduan itu tetap Umno teruskan.

"Itu sudah menjadi tekad kita dan kita tak akan ubah pendirian kerana perpaduan itu adalah satu yang dituntut oleh agama dan kita akan tetap laksanakan," katanya.

- Bernama

<http://www.malaysiakini.com/news/166051>